

A CHIE PONET FOGU
(ma poite!)

In tempus antighissimu Nerone
ischimus tottu ch'at brujadu a Roma
però l'at fattu po una reione
chi costat pagu a til'ispiegare;
la cheriat a nou fraigare,
a segundu sa sua intenzione.

^^^

Ma tue, a m'ischis narrer su poite
cando 'enit s'istiu pones fogu?
azzendes su lomminu in dogni logu
o it'es cuss'ordinzu ch'impiegas?
Ses risolutu, no mil'ispiegas
ne mi naras cun chie ses in lite.

^^^

Si b'at una rejone motivada
poite ti caglias mudu e no lu naras?
Unu di tenet sas bideas giaras
mai in s'anonimadu si riparar,
faghet si s'azione ma lu narat,
sa tua invece est una vigliaccada.

^^^^

E ses brujende intreos bidatones
e su motivu non bogas a campu,
birdes forestas non tenen iscampu
gulpa 'e sa manu tua disumana.
Ma sas piantas ite gulpa ndana
o ite gulpa tenen sos puzones?

^^^

Si l'asa contra su gener'umanu
prite ti oltas contr'a sa natura?
Agende gai semenas tristura
e non creo cun custu chi t'apaghes
ca si ti paret giustu su chi faghes
non b'at cossizu chi t'atat marrànu.

^^^

Deo invece cunvintu e seguru
unu cossizu ti lu chelzo dare,
toccat a tie poi a seberare
si lu cheres o no ponner in usu.
Ponemi mente, non brujes piusu
ca ses fattende dannu a tie puru.=

Garante

GIGI SANCIS

TISSI